

2 Jö Tecalonika

Köp na tye i waraga ka Paulo më arïö both jö Tecalonika

Arubaruba na makö nïnö më dwogo ka Kiricito ömëdërë më kelo ayela both jö n'oye Kiricito na tye i Tecalonika. Waraga ka Paulo më arïö both jö Tecalonika makö köp i kom yee ni nïnö më dwogo ka Rwoth ötimërë dong ökö. Paulo öyübö köp ni nakun kobo ni na bara dwogo ka Kiricito örömö, bal ëka tim na reco bino mëdërë rwök i thë löc ka ngat n'ecwodo ni “Atür Cík” na bino pyem ki Kiricito.

Akwëna Paulo kobo na tük i kom gin na mütërë both jö n'oye më cung na tük i kom yeeg i karë më ayela ëka can, më tic pi gin na myero ökwö gini ködë kite na Paulo ëka etic ewodhe obedo tic ködë, ëka më dangö më timö gin na bër.

¹ Waraga ni öya ki both Paulo gin ki Cilibwano* ëka Timoteo,

Both jö n'oye Kiricito na bedo gini i Tecalonika na gin ënë jö k'Obanga Apap ëka jö ka Rwoth Yecu Kiricito:

² An alëgö ni Obanga Apap ëka Rwoth Yecu Kiricito ömiiwu kica ëka kuc.

Ngölö-köp i karë më dwogo ka Kiricito

³ Utmegowa, wan myero emii pwöc both Obanga pi karë kibëc pirwu, piën yeewu tye ka döngö rwök

* **1:1 Cilibwano** Baibul nökenë cwodo ni Cila.

ëka mar ka ngat acēlacēl i kom awodhe thon tye ka mēdērē.

⁴ Pī manōn, wan etye k'awaka i kin jō n'oye Kiricito n'obedo gīnī jō k'Obanga i kom diō cwinywu ëka yee i ayela ëka atēmatēma kībēc na un itye ka dangō.

⁵ Man kībēc nyutho nī ngölō-köp k'Obanga tye kakarē, ëka pī manōn ebino kwanōwu nī jō n'opore pī ker k'Obanga na un itye ka dangō can pīrē.

⁶ Obanga bino tīmō gin na tye atīr, ēn bino mīō can i kom jō n'ōmīōwu can,

⁷ ëka bino mīō yweo both jō n'eyelo ëka bothwa thon. Man bino tīmērē i karē na Rwoth Yecu bino nen k'emalaika mērē na tēk kī i polo i mac na lyēl.

⁸ Ēn bino pwodo jō na ba ngeo Obanga ëka na ba wörō gīnī Emuth na Bēr ka Rwoth onu Yecu.

⁹ Ēn bino pwodogī kī can na bedo na twal ëka ebino ryēmōgī ökō kī i nyim Rwoth ëka kī i dheo mē tēkō mērē

¹⁰ i nīnō na ēn bino dwogo, ēn bino nwongo dheo kī both jōgē kībēc na leng ëka wörō kī both jō na yee i kome. Un thon ibino bedo i kin-gī, piēn iyee unu cadenwa na wan ekobo niwu.

¹¹ Ēnē ōmīō wan ēlēgō pīrwu i karē kībēc ëk Obanga onu ōmīīwu ibed jō n'opore kī cwodo mērē, ëka ökōnywu kī tēkō mērē mē cobo mitiwu kībēc na bēcō na un itio pī yeewu.

¹² Cē nyīng Rwoth onu Yecu ebino wörō pīrwu, ëka un thon inwong dheo pīrē pī kīca na yaa kī both Obanga onu ëka Rwoth Yecu Kiricito.

2

Dwogo ka Rwoth

¹ Utmegowa, na lübërë kī köp i kom dwogo ka Rwoth onu Yecu Kiricito ëka cökërë onu më rwatërë ködë, wan ëkwaöwu nī

² kür iwëk thamawu orubere ökö pïöpïö, cwinywu thon kür opodhi kadī pī köp k'adwarpiny onyo köp n'ëtütö onyo waraga mörö n'ekobo nī öya kī bothwa na kobo nī nīnö ka Rwoth dong othuno.

³ Ngat mörö kür öbwöluw i yore mörö këkën, pïën nīnö ka Rwoth bara bino naka ka jëm i kom Obanga obedo na tye ëka atür cık thon onen, ngat na myero ebol i mac më kapiny.

⁴ Ën bino pyem ëka bino tingere malö ën kënë na löö gin na kibëc n'ecwodo nī Obanga onyo gin mörö më awöra, ëk ebed i öt k'Obanga nakun nyuthere kënë nī ën ebedo Obanga.

⁵ Ba ipo unu nī an akobo niwu köp ni i karë na an atye bothwu?

⁶ Un dong ingeo ngö na tye ka jükö, ëk Ngat na Rac onen ka karë mërë n'opore örömö.

⁷ Pïën müng më tükö k'atür cık dong tye ka tic; ëntö ngat na tye ka jükö pod mëdërë më jükö naka ka ëryëmö ën ökö.

⁸ Cë atür cık bino nen ëka Rwoth Yecu bino neko ën ökö kī yamö më dhögë cë tyeko ökö i karë na ën bino dwogo.

⁹ Bino k'atür cık bino yaa kī i tic ka Catan nakun tio kī koth twodo kibëc më tango, anyuth ëka gin më aura gini,

¹⁰ ën bino tic kī bwöl na reco kibëc i kom jö na bino rwenyo. Gīn bino rwenyo pïën ökwërö gini marö köp adyer na larögi.

¹¹ Pī manön, Obanga bino kethogi i thë twër më bwöl ëk gīn oyee köp më twodo

¹² ěk köp ölöö jö kibęc na yee köp mē twodo ěntö cwinygĩ yom ĩ timö gin na ba tye atĩr.

Ěyēröwu pĩ larē

¹³ Utmegowa na Rwoth marö, myero wan ěpwö Obanga pĩrwu karē kibęc piēn Obanga öyēröwu ĩ acaki laröwu pĩ Tipo Naleng na lönyöwu mē bedo na leng ěka pĩ yee köp mē adyer.

¹⁴ Ěn ocwodowu ĩ larē ni k'Emuth na Bēr na wan ětītö niwu; ěk ömĩ ĩnywak unu dheo ka Rwoth onu Yecu Kiricito.

¹⁵ Pĩ manön utmegona, cung unu na tēk ěka ĩmak unu pwony na wan epwonyowu ködē kadĩ kĩ köp mē dhök onyo kĩ waraga.

¹⁶ Kobedini ěk Rwoth onu Yecu Kiricito kikome ěka Obanga Apap onu na marö onu kĩ kĩa mērē okwe cwiny onu kĩ gen na bedo naka naka,

¹⁷ öcük cwinywu ěka öjĩngwu ĩ gin na kibęc na bēr ĩ tic ěka ĩ köp.

3

Kwac mē lēga

¹ Mē ajiki utmegowa, lēg unu pĩrwa ěk köp ka Rwoth ömēdērē mē kēth piöpĩö ěka ěgam kĩ wörö, kite n'onwongo tye ködē bothwu.

² Lēg unu thon ěk Obanga ölarwa kĩ both jö na timö bal ěka jö na reco; piēn pathĩ jö kibęc ěnē tye kĩ yee.

³ Rwoth genere, ěn bino miöwu tēkö ěka bino gwököwu kĩ both ngat na rac.

⁴ Rwoth ömiöwa gen ĩ komwu, ěka wan etye kĩ gen nĩ itye unu ka mēdērē anyim mē tio ngö na wan ekobo niwu.

⁵ An alëgö nî Rwoth ötël cwinywu î mar k'Obanga ëka îdiö cwiny na yaa kî both Kiricito.

Cîk më tio tic

⁶ Utmegowa, an aciköwu î nyîng Rwoth onu Yecu Kiricito më pokere ökö kî dhanö mörö na bedo abeda abonge tic ëka na ba lübö pwony na wan ëmïögî.

⁷ Un kikomwu ingeo na bër kite na myero ipor unu kî kitewa. Wan onwongo ba ebedo abeda abonge tic î karë na wan etye bothwu.

⁸ Wan ba ëcamö cem ka ngat mörö abonge cülö, ëntö wan eyelere kî tic î kiceng ëka î kiwor ëk kür eketh pëkö î kom ngat mörö kî î kinwu.

⁹ Wan ëtimö kömanön pathî nî wan epe kî twërö më nwongo köny kî bothwu ëntö wan ëmîrë kënwa më bedo apor bothwu më alüba.

¹⁰ Î karë na wan etye bothwu, wan ëmïöwu cîk nî: “Ngat n'ökwërö tic myero kür ocem.”

¹¹ Wan ewinyo nî jö mökö kî î kinwu bedo gîni abeda abonge tic ëntö dönyö gîni î tic ka jö nökenë.

¹² Wan ëcikö koth jö nön ëka dökî ëbakö dhöwa î Rwoth Yecu Kiricito nî myero gîn otii ticgî ëk ngat acëlacël öpidhërë kënë.

¹³ Ëntö utmegowa, kür idher unu më timö gin na bër.

¹⁴ Ka ngat mörö ökwërö lübö cîk na tye î waraga nî, myero inîang unu î kom ngat nön na bër, ëk kür iribërë unu kodë ëk lewic ömakî.

¹⁵ Kür iter unu ën na calö langö ëntö na calö ömînwu.

Köp më ajiki

¹⁶ An alëgö nī Rwoth mē kuc kikome ömīīwu kuc i karē kibēc ēka i yodhi kibēc. Rwoth obed kodwu kibēc.

¹⁷ An, Paulo, acöö moth ni kī cīnga an kikoma, man ēnē kite na an aketho kī cīnga i waragana kibēc. Man ēnē kite na an acöö kōdē.

¹⁸ Kīca ka Rwoth onu Yecu Kiricito obed kodwu kibēc.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80